

藥品化義卷九

鴛洲賈所學九如輯著

趙郡李延是期叔補訂

火藥

龍膽草

屬純陰

有金水

體乾

色灰帶紫

氣和

味大苦帶澀

性寒

能

升

力瀉肝火

性氣與味俱厚

入肝胆胃三經

胆草秋開花得金令司權金能制木且味苦如胆故專瀉肝胆之火主治目痛頸癰兩脇疼痛驚癇邪氣小兒疳積凡屬肝經熱邪爲患用之神妙其氣味厚重而沉下善清下焦濕熱若囊癰便毒下疳及小便澁滯男陽挺腫脹或光亮出膿或莖中癢痛女人陰癰作痛或發癢生瘡以此入龍胆瀉肝湯治之皆苦寒勝熱之力也亦能除胃熱平蛔蟲蓋蛔得苦即安耳但脾胃虛者少用

牛蒡子 屬陰中有微陽 體小肉微潤 色肉白衣青 氣和 味肉苦帶微

辛 性寒 能升能降 力解熱毒 性氣薄而味厚 入肝肺二經

牛蒡子味苦能清火帶辛能疏風主治上部風痰面目浮腫咽喉不利諸毒

馬刀瘰癧頸項痰核血熱痘時行疹子皮膚癰疹凡肺經鬱火肺經風熱悉宜用

此

略炒搗碎用別名
鼠黏又名惡實

黃連 屬陰 體乾 色黃 氣和 味大苦 性寒而清 能浮能沉 力瀉

心火 性氣薄而味厚 入心肝脾胆胃大腸六經

黃連味苦苦能燥濕而去垢性寒寒能勝熱而不滯善理心脾之火凡口瘡牙疼

耳鳴目痛煩燥惡心中焦鬱熱嘔吐痞悶腸痺下痢小兒疳積傷寒吐衄諸痛瘡

瘍皆不可缺入香連丸祛腸中積滯有厚腸之功入吳茱丸除吞吐酸水有清胃

之力此皆一寒一熱陰陽相濟最得制方之妙若薑製以和其寒少變其性引至熱所不至牴牾則能止嘔酒炒引上以清頭目豬胆拌炒瀉肝胆火單炒黑用脾虛熱瀉獨爲妙劑生用癰腫解毒尤其所宜但胃中停食及胃虛作嘔傷寒下早致痞皆宜禁用

川產肥大肉如黃金色者佳

連翹 屬陰 體輕 色蒼 氣和 味微苦 性涼 能升能降 力清三焦

火 性氣與味俱輕清 入心肺肝脾三焦胆胃諸經

連翹氣味輕清體浮性涼浮可去實涼可勝熱總治三焦諸經之火心肺居上脾居中州肝胆居下一切血結氣聚無不調達而通暢也但連翹治血分功多柴胡治氣分功多同牛蒡子善療瘡瘍解痘毒尤不可缺

犀角尖 屬陽中有陰 體重 色本黃尖黑剉碎則白 氣香 味苦帶微酸

而鹹 性涼 能升能降 力清心膽 性氣與味俱輕清 入心肺肝膽胃

五經

犀角氣香屬陽主走散性涼屬陰主湧泄妙在陰陽並用善清虛火上炎致旺
妄行肺胃中蓄血凝滯又取其味苦酸鹹恰合心神之性蓋心惡熱以苦涼之心
苦緩以酸收之心欲軟以鹹軟之且清香透心以此益心神即能鎮肝氣一切心
經肝膽之熱必不可缺若小兒驚癇疳熱痘瘡血熱尤為聖藥

犀角用尖取力之精銳在尖以帛包置懷中良久水磨則易下調入力勝用剉末煎服效捷

石膏

屬陽中有陰

有金水

體重

色白

氣和

味淡帶微辛

性涼

云寒非

能沉能升

力涼腸胃

性氣薄而味濁

入肺胃大腸三經

石膏色白屬金故名白虎體重性涼而主降能清內蓄之熱味淡帶辛而主散能

祛肌表之熱因內外兼施故專入陽明經為退熱驅邪之神劑一切譫語狂發斑

疹毒齒痛脾熱胃火皆能奏效如時氣壯熱頭痛或身熱有汗不解及汗後脈洪而渴或暑月中熱體痛頭疼汗多大渴或熱極瘡久渴甚咽痛口乾舌焦黃赤胃熱邪內盛蒸發於肌表藉此通解而行清肅之氣若無汗而渴及小便不利并腹痛嘔瀉飽悶皆宜禁之

取色白者夏青色雜者別去略煨帶生用多煨則體膩性斂酸調封丹爐甚於脂膏膏字取義如此

黃芩 屬陰 體有枯有實 色黃 氣和 味苦 性寒 能浮能降 力清

熟 性氣與味俱厚 入肺胃大腸三經

黃芩中枯者名枯芩細條者名條芩一品宜分兩用蓋枯芩體輕主浮專瀉肺胃上焦之火主治胸中逆氣瞞上熱痰咳嗽喘急目赤齒痛吐衄失血發斑發黃痘疹瘡毒以其大能涼膈也其條芩主降體重專瀉大腸下焦之火主治大便秘結小便淋濁小腹結脹腸紅痢疾血熱崩中胎漏下血挾熱腹痛譫語狂言以其能



清大腸也同枳實紫朴能消穀食因邪熱不殺穀以此清胃則易消穀食同柴胡
退熱柴胡散火之標以此折火之本同白朮安胎蓋白朮健脾但胎坐中宮
運行易生鬱熱以此清熱胎動自安用豬膽汁拌製入厥陰肝經以清抑鬱
止胎前瘧寒戰震動不使墮胎

山梔 屬陰 體皮輕子潤 色黃帶赤 氣和 味苦 性寒 能升能降

力清肺胃 性氣輕味重 入肺胃肝膽三焦胞絡六經

山梔色赤類火味苦降下取其體質輕浮從至高之分使三焦火屈曲下行主治
肺熱咳嗽吐衄妄行胃火作痛面赤鼻皴目赤耳瘡嘔噦腹滿鬱熱淋閉腸紅疳
氣一切鬱遏之火小便泄去又治虛熱發渴病後津血已亡胃腑無潤同知母治
煩燥蓋煩屬肺氣山梔主之躁屬腎血知母主之

取圓小者良炒去穢
氣帶性用不宜太過



知母 屬陰中有微陽 體潤 色淡黃 氣和 味苦略辛 性涼 能升能

降 力清火滋陰 性氣與味俱平 入肺胃腎三經

知母味微苦略辛蓋苦能堅腎辛能潤腎滋養腎水獨擅其長主治腎虛火動陰火攻冲虛勞痰嗽有汗骨蒸往來寒熱咽癢心煩蓋腎水生則虛火降諸症自愈取其體潤滋肺性涼清肺以療火瘡煩熱熱病瘥後產後蓐勞久嗽無痰有生津除熱之功因其色黃入陽明經以瀉胃熱用在白虎湯治邪熱入胃胃火燔燥消渴熱中又治煩燥不睡蓋煩屬肺氣躁屬腎血以此清胃即清肺腎之源則煩躁自止與黃柏並用非為降火實能助水與貝母同行非為清痰專為滋陰但脾虛便瀉忌之

取肥大清白者佳略炒去外毛用條細油黑者不用

黃柏 屬陰中有微陽 體毛乾 氣和 味大苦 性寒 能降 力清腎火

性氣與味俱厚而燥 入腎膀胱二經

黃栢樹高數丈其皮從上直下味苦入骨是以降火能自頂至踵淪膚徹髓無不週到專瀉腎與膀胱之火蓋腎屬寒水水多則漸滑涸渴則變熱若汞從臍下起者陰火也內經曰腎欲堅以苦堅之堅卽爲補丹溪以此一味名大補丸用鹽水製使鹽以入腎主降陰火以救腎水用蜜湯拌炒取其戀膈而不驟下治五心煩熱目痛口瘡諸症單炒褐色治腸紅痔漏遺精白濁濕熱黃疸又膀胱熱臍腹內痛凡屬相火用此折之腎自堅固而無旁蕩之患因味苦能走骨能沉下用酒拌炒四物湯調服領入血分治四肢骨節走痛足膝酸疼無力遍身惡瘡及腳氣攻冲嘔逆惡心陰虛血熱火起於足者蓋此一味名潛行散能散陰中之火亦能安蛔蟲以苦降之之義也

取川產肉厚深黃色者佳去粗皮用

地骨皮 屬純陰 體輕 色蒼 氣和 味太苦 性寒 能浮能沉 力除

有汗骨蒸 性氣薄而味厚 入肺腎三焦三經

地骨皮皮能散表外祛無定虛邪苦能入骨內除有汗骨蒸取其體輕輕能浮沉

上下上理頭風痛中去胸脇氣下利大小腸通能奏效入瀉白散清金調氣療肺

熱有餘咳嗽同養血藥強陰解肌調瘡痘不足皮焦以其性大寒酒煎二兩治濕

熱黃疸最爲神效牡丹皮能去血中之熱地骨皮能去氣中之熱宜別而用但虛

寒者忌之

去內骨及土用○足指及足底惡瘡用鮮地骨皮煎湯薰之竟日即有黃水出薰一三日腫退愈

滑石 屬陰中有陽金水與土 體潤滑而重 色白 氣微香 味淡性涼 能沉

力利六腑 性氣輕而味厚 入小腸膀胱脾胃四經

滑石體滑主利竅味淡主滲熱能蕩滌六腑而無尅伐之弊主治暑氣煩渴胃中

積滯便濁澁痛女人乳汁不通小兒痘疹發渴皆利竅滲熱之力也如天令濕淫太過小便癰閉入益元散佐以硃砂利小腸最捷要以口作渴小便不利兩症並見爲熱在上焦肺胃氣分以此利水下行煩渴自止若渴而小便自利者是內津液少也小便不利而口不渴者是熱在下焦血分也均非宜用且體滑胎前亦忌之

取白色細嫩者良刮去微黃土用○敷痘瘡潰爛甚妙

芒硝 屬純陰有金與土 體潤 色白 氣和 味鹹云皆非 性大寒 能降

力軟堅渴熱 性氣輕而味重 入肺胃大腸三經

芒硝體本水化稟陰凝聚煎汁結如鋒芒名曰芒硝味鹹軟堅故能通燥結性寒降下故能去火燥主治時行熱狂六腑邪熱或上焦膈熱或下部便堅經曰熱淫於內治以鹹寒用此爲君劑以水尅火也佐以苦辛與大黃苦辛之品相須而治



因鹹走血亦能通經閉破蓄血除痰癖有推陳致新之功惟疹子忌用恐鹹留內凝不能發出

若產後胞衣不下用硝三錢加牛膝歸尾各五錢酒煎臨服入童便一杯熱飲立下

初名朴硝煎製為芒硝再煎提為元明粉仲景只用芒硝立冬後煎入紅糖一匙計硝十斤用水十斤蘿蔔十斤煎至蘿蔔熟爛為度去蘿蔔傾硝入缸內去水即成芒硝照法再煎兩三次為元明粉

大黃 屬純陰 有土 體潤 色黃 氣雄而香 味大苦帶辛 性大寒 能

沉 力瀉實熱 性氣與味俱重濁 入胃大腸小腸胞絡膀胱五經

大黃苦重能沉帶辛散結氣味重濁直降下行走而不守有斬關奪門之力故號

為將軍專攻心腹脹滿胸胃蓄熱積聚痰實便結瘀血女人經閉蓋熱淫內結用

此開導陽邪宣通澀滯奏功獨勝如積熱結久大便堅實閉固難以取下又藉芒

硝味鹹軟堅兩者相須而用凡內外傷感鬱久皆變成燥燥甚為熱熱極為火三



者屬陽邪銷鑠腸胃最烈而速遂使濁陰不降清陽不升諸症蜂起若用硝黃如開門放賊急須驅逐宜以生用則能速通腸胃製熟以酒性味俱減僅能緩以潤腸勿畏而不用亦勿輕而悞施全在對證用藥貴乎多少合宜斯爲神乎

川產氣香
堅實者佳

石蓮肉

屬純陰

體乾實

色肉白殼黑

氣和

味大苦帶澁

性寒

能

沉 力清心

性氣輕而味厚

入心胞絡肺胃四經

石蓮肉生水中一名藕實味苦清火帶澁斂熱下行善解憂愁抑鬱心火上炎而尅肺金主治口苦咽乾五心煩熱及心虛生熱痢疾口噤便濁遺精上能清養心肺下能收攝腎水心腎不交用爲良劑若晝則發熱夜則安靜是熱在氣分以此同參芪爲清心連子飲退熱甚效

堅硬如石故名石
蓮去壳敲碎用



胡黃連 屬純陰 體乾而輕 色紫 氣和 味大苦 性寒 能沉 力涼

血 性氣薄而味厚 入肝膽胃三經

胡黃連色紫味苦獨入血分而清熱主治血虛骨蒸五心煩熱日晡肌熱臟毒瘡小兒驚癇瘡積丹溪云骨蒸發熱皆積所成此能涼血益陰其功獨勝發熱晝則明了是熱在血分以此佐芎歸爲二連湯除熱神妙又善解巴豆之毒膽草瀉肝火爲疏熱利下之品

牛薺清肝火爲解壅理上之品

黃連抑心火爲清熱厚腸之品

連翹涼心火爲利膈散結之品

犀角清心火爲涼血益肝之品

石膏退胃火爲解肌止渴之品

黃芩瀉肺火爲涼膈清腸之品

山梔降肺火爲清胃除煩之品

黃柏降腎火爲補陰降火之品

骨皮涼腎火爲清肺退熱之品

滑石導六腑爲利竅滲熱之品

芒硝清三焦爲軟堅潤燥之品

大黃瀉大腸爲去實通滯之品

石連清氣熱爲除晝鬱火之品

胡連涼血熱爲退夜骨蒸之品



藥品化義卷十

鴛洲賈所學九如輯著

趙郡李延是期叔補訂

燥藥

秦艽 屬陰中有微陽 體微潤 色淡黃 氣香 味苦微辛 性涼

非云溫

能升能降 力潤燥和血 性氣薄而味厚 入胃大腸肝膽四經

秦艽味苦能降帶辛能潤又氣香而性涼故獨專治燥蓋燥因血熱漸至血虧大腸本屬陽明燥金若血液衰耗則大便乾結煎熬肺金不生腎水至肺腎腸胃俱燥諸症蜂起咽乾口渴煩悶痞滿皮膚燥癢通身攣急肢節疼痛及牙痛眼澁浮腫黃疸疳積酒毒腸紅痔漏皆宜用此清利臟腑而不推蕩真良品也且助天麻治風熱頭暈同柴胡療骨蒸潮熱合紫苑潤腸利便佐牛膝利血滋陰俱有神效

去蘆頭
沙土用

麻仁 屬陰 體肉潤 色肉白皮蒼 氣和 味甘 性平 能升能降

潤氣燥 性氣薄而味厚 入肺大腸二經

麻仁味甘能潤腸體潤能去燥專利大腸氣結便閉凡老年血液枯燥產後氣血不順病後元氣未復或稟弱不能運行皆治大腸閉結不通不宜推蕩亦不容久閉以此同紫苑杏仁潤其肺氣滋其大腸則便自利矣

絹包浸沸湯中少泡之取起按去
壳取仁用或連皮敲碎入葯亦可

童便與陰血同類善通血脈能降火委曲下行滋陰抑陽清潤三焦傷寒湯中用人尿引薑附入少陰而無拒格之患經曰必同其氣可使平也

蜂蜜採百花之精味甘主補滋養五臟體滑主利潤澤三焦如怯弱咳嗽不止精血枯槁肺焦葉舉致成肺燥之症寒熱均非諸藥鮮效用老蜜日服兩許約

月未有不應者是燥者潤之之義也生用通利大腸老年便結更宜服之

秦艽主清燥爲血熱滋陰之品

麻仁主潤燥爲氣熱利腸之品

